

MAGPAUBOS KA SA IMONG KAUGALINGON



[Ginapaila ni Igsoong Neville si Igsoong Branham—Ed.]

Oh, Igsoon, masulti mo gayud nga usa kini ka sorpresa. Gusto ko lang ipahibalo dayon, “Himoang matun-an kini dinhi: kanako nga maghunahuna og usa ka butang nga sama niana.” [Nangatawa ang kongregasyon ug si Igsoong Branham.]

² Nalipay gyud ko nga maania dinhi pirme. Nagakahaduol na gyud ang among gipaabot nga biyahe karon, ang pagpabilin usab namo uban kaninyo. Tungod, aduna kami og usa na usab ka umaabot nga panagtigum didto sa Chicago, ug kinahanglan nga maibalik ko ang—ang akong pamilya didto sa Arizona dayon. Ug wala pa gyud sila nakabakasyon niining ting-init, ug kinahanglan ko silang dalhon unta sa mubong biyaheng-suroy sa kon asa man, sulod sa pila ka adlaw. Ug tingali wala ako sa usa, usa ka adlaw, usa sa niining mga Dominggo, ug dayon pagkasunod niana nga semana mosugod na ako didto sa Chicago. Unya kinahanglan kong mobalik dayon, sa Lunes, ug dalhon sila ngadto sa Arizona.

³ Ug karon nakapaguol kini kanako nga moanhi sa Dominggo sa buntag, og kuhaon kanang panahon tungod ang tanan lagsik pa. Pagka-gabii na sa Dominggo, tungod nga kapoy ug luya ka na, nianang Dominggo sa gabii; ug ginahatag na lang ang Dominggo sa gabii nga panerbisyo sa atong pastor, kana—kana mora og dili maayo. Apan dili ko gustong buhaton kana, ug bisan pa sa Dominggo sa gabii nga magpahigayon ako, Dominggo sa gabii, panerbisyo sa Dominggo sa gabii, unya langan ko pa gyud ang mga tawo. Daghan kanila dinhi nga gikan pa didto sa habagatan ug—ug sa halayong amihanan, ug sila, oh, usahay mobiyahe og tibuok adlaw ug gabii, aron makaanhi lang para sa usa ka panerbisyo, dayon mopauli pa. Ug mao kana ang hinungdan nga naningkamot gyud ko nga mapahigayon kini sa Dominggo sa buntag, pag-ania ko, aron mahatagan sila og kahigayonan nga makabalik dayon.

⁴ Matinuuron, matinud-anong mga magpapanaw, daw sa unsa kong ginapasalamatan sila! Nagamaneho sila latas sa madigyas nga ulan-nga-nyebe, ulan, ug tanan na, aron nga makaanhi lang, tabok sa mga kalungsoran, ginatus ka milya, para lang sa usa ka panerbisyo. Busa nagapabati kini kanako og puno nga pagpasalamat sa Dios, ug sa niining mga tawo, tungod sa ilang dakung—tungod sa ilang dakung suportara, sa kung unsay akong

ginapaningkamotan nga iwali, ngadto sa mga tawo, nga mao ang Kamatuoran.

⁵ Karon, nagatoo ko nga mao kini ang Kamatuoran, akong. . . sa tibuo ko kasingkasing. Kon aduna ma'y uban pa, nga sa hunahuna ko mas maayo, ako—sigurado ko nga ako ang unang moadto. . . dili ko mohangyo kang bisan kinsa man nga moadto og asa man nga dili ako usá ang unang moadto, aron hibaloon kung husto ba kini o sayup. Dili ko hangyoon si kinsa man aron—aron mohimo og lakang, diha sa Dios, nga wala ko usá gihimo ug ghibalo nga Kamatuoran kini. Una, kinahanglan nga Pulong kini sa Ginoo, dayon kinahanglan kong mohimo og lakang ug tan-awon kon husto ba kini. Ug unya kon husto kini, dayon mahimo ko nang isulti, “Ari kamo *niining* dalana.” Kita n'yo, nagabukas kini og dalan.

⁶ Ug, karon, sa hunahuna ko ang si kinsa man nga ministro kinahanglan gyud nga buhaton niya kana, kinahanglan nga siya ang unang moadto, mismo. Siya ang ginatan-aw nga lider, lider sa mga tawo, dili siya angay'ng mosulti og unsa man nga dili niya gani madawat, siya mismo. Kinahanglan nga mamahimo kitang mga lider gayud sa mga tawo.

⁷ Kaganinang buntag, aduna ko'y talagsaon, di-kasagaran nga kasinatian dinhi sa pulpito. Ug kadto, mahitungod sa ulahing bahin na sa Mensahe, wala ko gituyo nga masulti ko kadto sa ingon niadto nga paagi. Kita n'yo? Apan nasulti ko na kadto, ug wala na ako'y mahimo pa bahin niini karon. Apan sa pag-abot ko sa balay, gitun-an ko ang bahin niadto.

⁸ Ug nagkaaduna kami og gamay'ng pagtipon-tipon sa among pamilya karong adlawa, sa ako lang nga mga igsoon ug kanila. Wala na man gud si Mama. Ug naandan na namo nga magkita-kita didto sa iyang balay, ug karon didto na kami kang Delores. Nagkaaduna kami og maanindot nga kahigayonan didto kaganinang hapon, nga nagka-estoryahanay, ug kauban pud si Teddy didto. Nagkantahan kami, nagpatugtog og pipila ka mga alawiton ug ingon-ana nga mga butang.

⁹ Karon akong nahunahuna, tingali sa sunod Domingo sa buntag, kon itugot sa Ginoo, kung okey lang kang Igsoong Neville, gusto kong magpahigayon og panerbisyo sa pagpang-ayo, nga ginapahinungod lamang sa pagpang-ayo. Ug akong—ug akong nahunahuna, tungod sa Mensahe kaganinang buntag, tungod sa pamaagi sa Ginoo nga gigiyahan Niya ako aron hisgotan Kini, ipahayag Kini, medyo nakapadasig kini kanato og diyutay, nakita n'yo, nga—nga—nga magtoo gayud. Atong—ginabastabasta lang nato, ug atong—lahi ang atong pagpangagpas ug mga pagpamahayag bahin niini. Apan pagmoabot na sa pagpakitaay kung unsa gyud, makita nga lahi gyud. Sama sa . . .

¹⁰ Adunay tawo nga nagsulti kanako, nagatoo ko nga akong igsoon kini nga atua didto, nga nagsulti sa—sa diyutay'ng estorya karong adlaw, bahin sa usa ka tawo, usa—usa ka ministro ug ang iyang. . . usa, usa sa iyang kongregasyon, nagsulti siya nga mahimo kono niining ministro nga molakaw pas-an ang usa ka troso.

Siya miingon, “Pastor, sigurado, ang Ginoo anaa uban kanimo.”

Miingon ang pastor, “Mahimo kong pas-anon ang usa ka troso, samtang nagatabok ako sa dalan.”

“Sigurado gyud, ang Ginoo anaa uban kanimo.” Ug milakaw siya ug gibuhat kadto.

¹¹ Miingon siya, “Mahimo kong pas-anon ang usa ka troso, ug ginatulod pa gyud ang usa ka karetilya, nga dungan.”

¹² “Oo, Pastor, ang Ginoo anaa uban kanimo. Mahimo sa imong pagtoo ang tanan.”

¹³ Miingon siya, “Mahimo kong pasakyon ka sa karetilya, ug pas-anon ang troso.”

Siya miingon, “Karon kadiyut lang!” Kita n'yo?

¹⁴ Lahi gyud pag-ginalakip ka na diha niini, ikaw mismo. Kita n'yo? Karon, kana'y, maayo kaayo ang pagsulti nato dinhi og, “Amen.” Maayo kaayo ang pagsulti nato og, “nagatoo ako nga matuod kana.” Apan paghisgotan na ang pagbuhat niini. Kinahanglan ipakita mo gyud kini diha sa buhat.

¹⁵ Maingon sa akong pamahayag kaganinang buntag, ang mga tawo kaniadto nanagpahilandong sa landong ni Pedro, wala gani sila nihangyo nga maiampo.

¹⁶ Daghan nang mga panimalay ang nabisitahan ko, nga naobserbahan ko kini. Moampo gyud ko sa dili pa molakaw, ug moadto lang didto nga may pagdihog, ug wala gani miampo alang sa mga tawo, ug sa pagbiya ko didto ug nangaayo sila. Kita n'yo? Kita n'yo? Husto kana. Nakita ko nga nangahimo kini sa daghan na kaayong mga higayon! Kita n'yo? Kinahanglan aduna ka'y dapit nga mapahilunaan sa imong pagtoo. Kinahanglan mong toohan kini. Ug nagatoo ako nga ang maong panahon nagasingabot na, ug mao na kini karon.

¹⁷ Ug nasabot ko nga kini dili mao ang ginateyp nga panerbisyo. Tingali nagrekord sila og diyutay para lang kanila, apan dili kini gina-teyp aron ipadala sa tibuok nasud. Ang. . .

¹⁸ Kini ang akong gihisgotan kaganinang buntag nga naghatud kanato ngadto sa—ngadto sa pinaka-ginapaabot, ug kana mao ang hinungdan nga igapahinungod ko ang sunod Dominggo alang sa—sa—sa usa ka panerbisyo sa pagpang-ayo. Tungod nga, sukad niadtong nakapauli ko, naghisgot ako kaninyo bahin sa mga panan-awon ug kung unsa ang nahitabo, ug tanan na, ug

gitug-an mismo, kon ngano nga nahimo ko ang tanan niining mga butang. Ug dayon kaganinang buntag, naghisingot ko niini hangtud ngadto nianang katapusang Pagbira.

¹⁹ Karon panahon ko kini sa pagpahinungod-sa-kaugalingon ko ngadto sa Dios; panahon kini sa Dios nga makigsulti kanako. Kita n'yo, ako—ako—ako kinahanglan may pagkausab og diyutay sa ako mismong kinabuhi. Dili ingon nga nagahunahuna ako nga ako dautan, kondili ako—gusto kong mabati nga mas napaduol ako og diyutay ngadto sa mga tawo. Kita n'yo?

²⁰ Ang mga tawo nga akong gisulayan og sangyaw niining Ebanghelyong Kamatuoran, ug gipangtalikdan nila Kini, ug mipalayo ug gibiyabiayan Kini. Karon, alang kanako, daw sa pagpang-insulto kini. Pero dili ko igsapayan, para sa ako; kondili ngadto kini sa mga butang nga akong gipangsulti, nga Kini mao ang Kamatuoran nga gipaninguhaan kong makatabang kanila. Sama sa paduol nga ginatulod ang sakayan, ug nagaingon, “Ari mo, ania ang sakayan, pagtabok na! Dali, hawa mo nianang masulog nga suba, mamatay gyud mo! Ikaw, mamatay ka gyud dinha!” Ug kataw-an ka lang nila, ug mopalayo pa. Bueno, para kanako, gibati ko nga, kon mopalayo sila, wala na gyud ko'y mahimo pa bahin niana, kita n'yo, nga may mahimo pa ako.

²¹ Apan gusto kong modagan didto sa pangpang ug awhagon sila, “Pamalik mo!” Kita n'yo, kinahanglan nga aduna ko og ingon nianang pagbati, kita n'yo, tungod nasayod ko nga aduna pa'y usa didto nga wala pa nakasulod. Ug ako—ako magapangisda hangtud . . . Miingon Siya, hangtud masikup ang kaulahiing isda. Akong—gusto kong buhaton kana.

²² Karon, ug karon, aron sa pagbuhat niini, nagapaabot ako og usa ka butang nga mahitabo diha sa panagtigum alang sa pagpang-ampo. Usa ka butang . . . Ug daghan kaninyo ang makahinumdom pa sa panan-awon bahin sa—sa maong katapusang Pagbira, nianang Ikatulong Pagbira, diay. Inyong hinumduman, adunay butang nga nahitabo sa wala pa kadto: Nakita ko kadtong Kahayag nga miduol ug mipaubos niadtong lugara, ug miingon, “Makigkita Ako kanimo didto.” Karon nagapaabot ako alang sa usa ka butang nga mahitabo.

²³ Dinhi mga tuig na ang milabay, kasagaran kaniadto nga kining mga panerbisyo ug kanang espirituwal nga pagpang-ila magpaluya gyud og ayo kanako og nga makapasarasay pa gyud kanako. Daghan kaninyo ang makahinumdom niana. Moabot sa punto nga nagatindog ko ug anaa si Jack Moore nga gigunitan na ang akong bukton, ug si Igsoong Brown sa pikas usab, ug gasagakay kanako sa paglakaw sa dalan, sa mga usa ka oras human sa panerbisyo. Ug ako, ang nagakahitabo, ginahunahuna ko kung asa na kaha—kung asa na ako ug kung unsa na ang nahitabo. Dayon, tibuk gabii nga maghigda lang ako didto ug

ginahunahuna kadto, ug maghilak ug tanan na, ug matingala nganong dili man nila dawaton ang atong Ginoong Jesus.

24 Dayon giingnan Niya ako sa usa ka panan-awon, “Usa ka higayon mahinagbo mo ang usa ka gining nga magaduol kanimo, nga nagasul-ob og kolor-tabonon nga sinina, ug may ginakugos siya nga bata nga naputos sa habol, ug sukad nianang tungora, magkaaduna ka og dugang kusog aron makalahutay pa.” Bueno, gisulti ko kaninyo ang tanan niana. Nahitabo kini didto sa Chicago, niadtong gabhiona sa diha nga ang looy’ng Presbyterian nga gining, gipaadto siya sa iyang pastor didto nga kugos ang bata.

25 Ug nagatoo ko nga ang iya kadtong igsoon, o usa kanila, usa ka—usa ka doktor. Miingon siya, “Wala na’y paglaum kini nga bata gawas lang kung pagahikapon siya sa Makagagahum nga Dios.” Miadto siya . . .

26 Mibalik ang babaye ug giingnan niya ang iyang pastor. Ang iyang pastor miingon, “Ako—dili ako takus,” miingon siya, “aron—aron buhaton kining Balaanong pagpang-ayo, tungod kay wala ko . . . wala ako niini sa akong kinasuloran, ang pagtoo nga gikinahanglan aron mapahigayon kini.” Karon, kana, nagmatinuuron lang gyud siya bahin niini. Kita n’yo? Miingon siya, “Basta wala gyud ako niini.” Miingon siya, “Apan nakatambong ako niadto sa usa sa mga panagtigum ni Igsoong Branham, ug tambangan ko ikaw nga dalhon mo ang bata ngadto kang Igsoong Branham.” Ug ang doktor misrender na niini, ug mamatay na niadto ang maong bata.

27 Ug ang maong babaye misulod didto nga diin ako nagapahigayon og usa—usa ka panerbisyo para niadtong Katolikong mga kabataan nga nangapaso, didto niadtong eskwelahan, kabalo namo. Inyong nahinumduman kung kanusa kadto nahitabo. Nagkaaduna kami niadto og panerbisyo, ug sa mismo niadtong entablado ania nagalakaw paduol ang luoy’ng gining nga nagsul-ob og kolor-tabonon nga sinina. Ang akong asawa ug sila nga nagalingkod didto, ug miingon ako . . . milingi ako ug milantaw, ug milantaw sa palibot, ug gitan-aw kon atua ba sila didto. Ug nahitabo nga, nga sa dili pa ako misaka, nagtoo ko nga si Billy Paul ug sila nakapakig-estorya na, o ang asawa ko o ang uban kanila, ngadto sa maong gining nga may gikugos nga bata. Ug ang gining misaka ngadto sa entablado, ug gipadayag sa Espiritu Santo ang tanang butang, ug giayo ang maong bata didto.

28 Mibiya na ako didto, ug sukad niadto wala na ako mibati og kakapoy. Kita n’yo, wala na kadto magpakapoy kanako, ug ako—nagapadayon lang ako ug nagapadayon.

29 Karon nagapaabot ako og usa ka butang nga mahitabo, ug masugdan na kanang Ikatulong Pagbira diha sa katuyoan niini. Kita n’yo? Ug tingali sa panerbisyo sa pagpang-ayo sa sunod nga

Dominggo sa buntag, tingali magpamunga kini og ingon niana. Wala ko kabalo.

³⁰ Siguro, ang maayo natong buhaton, maoy sultihan n'yo ang inyong mga tawo, dalhon dinhi ang mga tawong masakiton. Karon, para sa panerbisyo sa pagpang-ayo, kinahanglan nato nga ipahinungod kini sa masakiton nga mga tawo. Ubana ang inyong masakiton, ug dalhon sila dinhi og sayo sa sunod Dominggo sa buntag, ingnon nato nga mga alas otso o alas otso-traynta, ug panghatagan nato sila og prayer kard samtang nagasulod sila diha sa pultahan, sa unsa mang paagi nga mahimo nila kini. Ug dayon magpahigayon kita og linya sa pagpaampo ug mag-ampo alang sa mga masakiton, ug tan-awon lang kung unsa ang pagabuhaton sa Balaang Espiritu.

³¹ Nagatoo ako nga magapamuhat Siya og mga katingalahan kung magatoo lang kita Kaniya, kita n'yo. Apan kinahanglan nato nga toohan Siya alang niana karon, uban sa tibuok natong kasingkasing. Ug nagtoo ko nga ang bililhong takna miabot na sa dihang ang Dios, sama sa atong gihisgotan kaganinang buntag, ingon ka daghan na ang gipakita kanato, ug gidala kita ngadto sa usa ka . . . ngadto sa usa ka punto. Magsugyot ka lang nga malatas kanang gamay'ng bungtod, ug ingon lang niana ang imong gikinahanglan, dayon paingon ka na diay niini. Kita n'yo, usa—usa ka pagpadayon nga sama niana, mao ra gihapon, diha sa espirituwal nga mga pag-ila, mao ra gihapon bahin sa mga pagpropesiya, ang makita n'yo.

³² Nagatindog ako didto sa Calgary . . . pasayloa ako, didto diay kini kaniadto sa siyudad sa queen, didto sa Regina, Regina. Ug nagatindog didto si Ern Baxter, ug usa kami ka panon. Ug ang Ginoo nagsulti kanako, dinhi mismo sa entablado, “Magakahitabo kini, mahibaloan mo ang pinaka-tinago sa ilang kasingkasing.” Ug husto kana. Ug wala ko gayud hunahunaa kadto sa ingon nianang paagi. Misaka ako didto sa entablado niadtong gabhiona, uban ni Ern, ug sa nagsugod na sa pagpang-ampo alang sa masakiton. Ug ania nagaduol ang usa ka tawo, bug-os nga gibutyag ang tibuok niyang kinabuhi; pinakaunang higayon kadto nga nahitabo nga ingon niana, sa kalit lang, diha sa panerbisyong pagpang-ayo. Ug dayon sa milantaw ako ngadto sa mga mananambong, ug ania Kini nga nagasugod og kunsad ngadto sa mga mananambong ug mga butang nga ingon niana. Oh, unsa pa kaha pagmoabot na kita sa pikas bahin! Ang katunga wala pa kini maiasoy, bahin niining mga butanga, nga bantayan nato, ug ang makita ang mga butang bahin sa kinabuhi sa mga tawo. Wala ko'y ginasulti og bisan unsa man bahin niini. Ginapasagdan ko lang kini, kita n'yo, gawas lamang kung mapugos akong mosulti og usa ka butang.

³³ Ug karon nagapaabot ako alang niining sunod nga magasugod og sama niana. Kita n'yo, ang Dios, diha sa Iyang Kaugalingong pamaagi, sa Iyang Kaugalingong gamhanang

panahon, nga sugdan kini. Ug kini—kini mamahimong lahi nga—nga mas labaw pa kay sa unsa man niining duha. Kita n'yo? Ug ginapaabot ko kana nga mahitabo.

³⁴ Ug tingali, akong nahunahuna, kon magpahigayon man ako og panerbisyong pagpang-ayo sa sunod Domingo na siguro. Dayon sa sunod niana nga Domingo wala ako tungod kinahanglan kong ubanan ang mga bata ug sila, kinahanglan man gud nilang makabalik ug aron maka-eskwela. Ug dayon sa sunod Domingo, ako, siyempre, atua ako sa Chicago, sa buluhaton didto. Ug unya mobalik pagkasunod Lunes, makalakaw na usab sa Martes para—para sa Arizona, para makabalik sa eskwelahan ang mga bata.

³⁵ Bueno, unsa ma'y imong nadiskubre, pastor? [Nagaingon si Igsoong Neville, “Bueno, nadiskobrehan ko ang usa ka butang nga talagsaon kaayo.”—Ed.] Maayo, maayo gyud kana, karon gusto nato nga madungog ang bahin niana.

³⁶ Busa karon ang—ang Ginoo magapanalangin kaninyong tanan, og ayo, og ayo gyud. Ug ako—nagalaum ako nga magkitakita kita sa sunod Domingo. Ug sa Miyerkules sa gabii. . .

³⁷ Ug paminaw. Ayaw kalimti kining gagmay'ng mga kasimbahanan, sama ni Igsoong Ruddell, ni Igsoong Jackson, ni Igsoong Parnell, ug ang tanan niining mga kaigsoonan nga nakigbisog gayud og ayo didto, kita n'yo. Ug gibati nila nga kita mao'y ilang—ilang—ilang kauban nga iglesia dinhi, nakita n'yo. Mora kita og gamay'ng inahan sa grupo para kanila. Nga diin dinhi sila gipakatawo, gikan dinhi, ang maong mga pastor ug uban pa.

³⁸ Ug kining igsoon dinhi sa luyo, kining igsoong lalaki, nahimamat ko siya sa miaging gabii didto, si Allen, si Igsoong Allen. Nagalaum ako nga si Igsoong Collins dinhi makapakighimamat kang Igsoong Allen, kung wala pa sila mag-ilhanay. Pareho silang mga Methodist nga mga ministro, ug nga—nga nakita nila ang Kamatuuran sa Pulong.

³⁹ Nga, ang—ang organisasyon sa Methodist nga iglesia, diin pundok kini sa maayo kaayong mga tawo kanang Methodist nga iglesia. Ayaw gayud ninyo hunahunaa nga dili sila ingon niana. Ingon niana sila. Mga maayo kaayo sila nga pundok sa mga tawo dinha sa Katolikong iglesia. Mga maayo kaayo sila dinha sa Presbyterian nga iglesia. Ug tanan nianang mga simbahan dinha, mga kalalaken-an ug mga kababayen-an kini nga nagapaabot aron makita kanang Kahayag nga magadan-ag sa ilang dalan. Ipapadayon lang ninyo og dan-ag ang Kahayag, nga may pagkamapainubsanon, og kalomo. Managtubo kitang tanan nga nagapaduol pa ngadto sa Dios, pinaagi sa pagpaubos sa atong mga kaugalingon. Kita n'yo?

40 Ayaw kalimti, kining tabernakulo puedeng mawad-an og iyahang kusog. Hinumdumi nga kini ang sentro kon diin nakapunting ang tanan nga pusil ni Satanas didto sa impiyerno. Mahimo niya ang usa ka tawo nga mobuhat og usa ka butang nga supak sa kon unsa ang ginahunahuna sa usa pa. Ginabuhat niya kana. Mao kana iyang tuyo. Iyang kanang buluhaton, kon mapasulti niya lang og usa ka butang ang usa ka tawo, magsulti-sulti og bahin sa usa pa ka tawo, moingon, “Bueno, paminaw, kabalo ka ba nga mibuhat si *Ingon-niini ug ingon-niana?*” Ayaw gayud pagpaminaw niana. Ayaw gayud paminaw, man lang niana. Yawa kana. Kita n’yo, si Satanas kana. Ayaw gayud toohi kana.

41 Kon aduna may butang nga sayup nga nahimo sa usa ka tawo, iampo sila. Ug ayaw pag-ampo sa mahakogon nga paagi, nga nagaingon, “Nasayud ko nga katungdanan ko kini, kinahanglan ko man gud mag-ampo para nianang igsoon.” Kinahanglan nagagikan kini sa imong kasingkasing, sa kinasuloran, para nianang igsoong babaye. Ug makig-estorya lang ug magmalomo gayud, ug mahibaloan mo na lang, makaplagan mo sila nga nagabalik na sa panagtigum pag-usab. Kita n’yo? Tungod nga, human niining tanan, nagapadulong kita ngadto sa pagsalop sa adlaw.

42 Ang Ginoong Jesus magaabot usa sa niining mga adlaw. Ug, kabalo mo, nahunahuna ko nga sa kalit lang ug sa ingon—sa ingon kalomo, ug busa usa ka gatus ka porsiyento . . . halos usa ka porsiyento sa tibuok kalibutan ang dili masayud nga nahitabo na diay kanang Pagsakgaw. Mahitabo kini sa ingon kahilum lang gayud nga walay si kinsa man ang makahibalo og unsa man mahitungod niini. Kita n’yo?

43 Ug magkaaduna, siyempre, og gagmay’ng mga pundok nga moingon, “Hala, karon, *si Ingon-niini ug ingon-niana?*”

44 “Oh, ingon nila aduna kono og pundok sa mga panatiko didto, ang ingon nga nawala kono kini nga pundok, ug sila’y . . . Dili man kana tinuud. Namalhin man lang sila sa ubang lugar. Nagkaaduna na baya kita og ingon nianang panatisismo, kita n’yo.”

45 “Hala, nag-ingon sila nga kanang gamay’ng tabernakulo, diha sa lugar nga gitawag og Jeffersonville, aduna kono og daghan sa ilang miyembro ang wala na makit-i.”

46 Kita n’yo, ila kanang balewalaon. Moingon sila, “Oh, wala kana’y pulos, nakita n’yo,” sama niana, ug nahitabo na diay Kini ug wala sila mahibalo.

47 Tibuok nasud, mahitabo kini, nga kadtong mga nangamatay diha kang Cristo mao’y maunang mamangon. Ang Pagsakgaw magakahitabo, ang Iglesia pagalalinon pauli na sa Puloy-anan. Ug dayon mosunod na ang Kasakitan, ug, oh, grabe, ayaw natong maanaa pa nianang panahona. Ayaw kong maania pa nianang

Kasakitan. Dili g'yud. Dili unta itugot sa Dios nga si kinsa man kanato ang mahabilin dinhi nianang panahona. Tungod nga, “ang mahugaw magmahugaw gihapon siya; ang balaan magbalaan gihapon siya; ang matarung magmatarung gihapon siya.” Wala na’y. . . Ang Kordero mitungha na uban sa Iyang Basahon sa Katubsanan, ug ang Pangasaw-onon gikuha na. Kadtong mga nagsalikway Niini magaaagi ngadto sa panahon sa Kasakitan, ang parehong mga Judio ug Gentil. Grabe kini nga panahon sa Kasakitan! Ayaw ko niana.

⁴⁸ “Ginoo, balaana ako karon.” Maayo kana nga doktrina sa Nazarene, dili ba? [Nagaingon si Igsoong Neville, “Amen.”—Ed.] Ug matuod kini, usab. Matuod gyud kini. Husto kana. “Puna ako karon sa Imong Balaang Espiritu, Ginoo. Tangtanga ang tanang pagka-kalibutanon gikan kanako karon, Ginoo. Ayaw—ayaw itugot kanamo nga magkaaduna og. . .”

⁴⁹ Sama sa giingon sa tigulang nga itum nga igsoong lalaki, “Sir, ania na sa akong mga kamot ang akong tiket. Human na nabuslotan kini. Pag-atua na ako sa maong suba, nianang buntaga, dili ko gustong magkaaduna og unsa man nga problema.”

⁵⁰ Busa, mao kana’y husto, ako—dili ko gustong magkaaduna og unsa man nga problema. Kupti sa inyong kamot ang inyong tiket, tungod kay patabok na kita. Hunahunaa lamang kini, haduol na ang dakung panahon sa katubsanan.

⁵¹ Ug karon ang usa pa ka butang. Igsoon, unsa gani iyang ngalan, kadtong didto sa Utica? Sa pagtoo ko si Igsoong Graham, ug aduna didto ug usa pa ka igsoon nga nagapastor. Usa ka Igsoong Shanks o ingon niana, o Sink? [Nagaingon si Igsoong Neville, “si Igsoong Snelling.”—Ed.] Si Igsoong Snelling ang pastor, diay. Si Igsoong Snelling na ang nagapastor karon didto sa Utica. Sa pagtoo ko ang ilang panagtigum sa pag-ampo kada. . . [“Huwebes sa gabii.”] Huwebes sa gabii. Karon, kabalo mo, maanindot gyud unta kon makadalikyat kita didto sa Huwebes sa gabii ug makapag-fellowship niadtong mga kaigsoonan. Kita n’yo? Ug dayon kung si Igsoong Jackson, kung magkaaduna pud siya og higayon, pagmakatigum ta og atong gamay’ng grupo dinhi ug moadto usab ta didto.

⁵² Padayon lang sa pag-ampo, padayon lang sa pagkalot! Oo, ayaw’g undang. Sama lang sa giingnan sila ni Elias kaniadto, miingon, “Pagkalot kamo og mga kanal dinha!”

Sa inyong pagkalot paubos, maigo ninyo ang usa ka karaan na nga lata, moingon, “Gikapoy na kaayo ko”? Ilabay kini ug magpadayon lang sa pagkalot. Kita n’yo? Magpadayon lang sa pagkalot, tungod kinahanglan nato nga magkalot. Kinahanglan gyud nato nga magkalot, kana lang. Tungod nga, kon inyong—kon nagadahum kamo nga malikayan ang Kasakitan, maayo pa nga magsugod na kamo og kalot.

53 Ug karon, para sa akong kaugalingon, ginawalihan ko ang akong kaugalingon niana. Sugdan ko nga magkalot og mas halawum kay sa nakalot ko kaniadto. Tungod, gibati ko nga, sa niining nasud ug sa tibuok kalibutan, kining ministeryo na usab, ingon nga naila na kini karon sa bisan asa sa tibuok kalibutan. Ako—kinahanglan kong mosangyaw pag-usab.

54 Nagsulti kanako ang akong asawa. . . Sa miaging buntag, miingon ako, “Gusto ko nga ubanan mo ako sa dihang molakaw ako. Mobyahahe ako sa mga Enero, kon itugot sa Ginoo. Gusto ko nga kumpletong liboton ang tibuok kalibutan, liboton balik; mobalik dinhi ug magpahigayon tingali og mga panerbisyo sa Estados Unidos, sa umalabot nga sunod ting-init.”

Ug miingon siya, “Tigulang na man kaayo ko nga mobiyahe pa.”

55 “Bueno,” ingon ko, “Mibiyahe na man ko kaniadto sa dihang ako’y. . . bahin sa akong ulahing biyahe sa gawas-nasud, mga walo na katuig ang milabay, ug akong nabati nga mas maayo ang akong panglawas karon kaysa niadtong walo katuig na ang milabay, kabalo namo. Kita n’yo? Mas nahibalo na ako karon bahin niini.”

56 Ug dayon among nahisgotan, “Unsa kaha kung ang Ginoo moingon, ‘Pagagahinan Ko ikaw og baynte-singko ka mga tuig. Nga dili ka mamaluya. Mamahimo mo pa ang pagbiyahe, ug pagagahinan Ko ikaw og baynte-singko ka mga tuig ibabaw sa yuta,’ pillion mo kaha kini gikan—gikan sa imong pagkahimugso ngadto sa baynte-singko, o gikan sa baynte-singko ngadto sa singkwenta, singkwenta ngadto sa sitentay-singko, o sitentay-singko ngadto sa usa ka gatus?”

57 Karon, ang si kinsa man nga tawo nga gigahinan og panahon ibabaw sa yuta, siguradong mabuhat gyud niya ang pinakadanghag nga butang kon dili niya igahin ang maong panahon diha sa pag-alagad sa Dios. Dili ko igsapayan kung unsa pa ang iyang ginabuhat.

58 Karon, kon gusto mong mamahimong tigpaguol sa kasingkasing sa mga kababayan-an, o sa uban pa, siguradong pilion mo gyud kanang batan-ong edad, kanang unang baynte-singko. Kita n’yo?

59 Kon gusto mong mamahimong panday, mekaniko, o unsa man, siguradong pilion mo ang ikaduhang baynte-singko. Kita n’yo?

60 Dayon naghunahuna ko, “Unsa kaha ako? Asa kaha ko mopili?” Pilion ko ang gikan sa sitentay-singko ngadto sa usa ka gatus. Mamahimo akong mas alisto, mas maalamon. Mamahimo akong mas lig-on. Mas nasayod ako sa kung unsa ang akong ginabuhat. Ako’y napulo, otso o napulo na, ka tuig nga mas tigulang kaysa edad ko kaniadtong ulahi kong pagbiyahe gawas

sa nasud. Dili na ako mohasmag nga mora og gapamatay sa mga bitin. Mas may hibalo na ako bahin niini, kita n'yo. Nasayod na ko kung unsaon.

⁶¹ Sama ra sa usa ka irong-igpangayam og mga racoon nga nagapakigbugno sa usa ka racoon, kita n'yo. Nahibalo ka kung unsaon pagtangag kaniya. Dili nga dire-diretso ka lang; pagakarwason ka niini. Kita n'yo, hibaloon mo ang iyang mga istilo ug bantayan siya kung unsa ang iyang mga panglihok. Ug tun-an pa nato og dugang ang bahin sa kaaway. Busa kinahanglan natong hibaloon ang tanan niyang mga pamaagi, ug kung giunsa niya sa pagduol, ug kung unsa ang iyang ginabuhay, ug tun-an ang iyang mga sumbag, pagkahuman niana hanas ka na nga makigharong kaniya, kita n'yo.

⁶² “Busa nagatoo ko karon,” giingnan ko ang akong asawa, “Nagatoo ko nga mas kondesyon na karon ang akong lawas kaysa niadtong kuwarenta anyos pa ako, niadtong mibiyahe ako.” Kita n'yo, ug singkwentay-kuwatro na ako. Ug nagatoo ko, kon lugwayan pa ako ug mahimo ko sa gihapon ang pagbiyahe ingon sa mahimo ko karon, pag ang edad ko usa na ka gatus, kon akong. . . kon malangan pa si Jesus, mamahimong mas kondesyon akong lawas nianang panahona kay sa usa ako karon, sa mga pagbiyahe. Kita n'yo? Tungod kay, mas nahibaloan mo na ang bahin niini, mas nahibaloan mo na kung unsay buhaton, ug unsaon pagdala niini, unsaon sa pag-atubang sa mga sitwasyon.

⁶³ Ipananglit nato ang mga tawo karon, kon sila paga-operahan. “Nag-ingon sila nga bag-ohay lang siya nigradwar sa pagka-doktor sa miaging adlaw, ug bag-ohay lang gyud siya nakatapos sa tulonghaan sa medisina. Wala pa siya og kasinatian sa pagpang-opera. Siya ang magaopera.”

⁶⁴ “Oh, dili,” moingon gyud ka, “wala siya'y buhaton og unsa man. Ayaw kanang tawhana. Dili, sir. Bisan pa man, dili, gayud. Dili gyud ko gusto nga siya ang mohiwa sa pag-opera kanako. Bueno, mas maayo pa hinoon nga didto na lang ako ug si *Ingon niini-ug-ingon niana* ang kuhaon ko. Nadungog ko man gud siya nga daghan na siyang naoperahan. Nasayod gyud siya kung unsaon pagbuhat niini.” Mao gyud kana, kita n'yo. Husto kana nga ideya.

⁶⁵ Ginahunahuna mo ang bahin niini, pero unsa man pud ang bahin sa nianang kalag? Gusto ko ang usa ka tawo nga nahibalo gayud kung asa sila nagabarug, ug nahibalo sa dalan; nga nakaagi na niini. Oo, ingon niana gyud.

⁶⁶ Ang Ginoo magapanalangin kaninyo. Sige, Igsoong Neville, duol na diri karon. Ug ang Ginoo magapanalangin kang Igsoong Neville. Ayaw kalimti karon, sa sunod Dominggo.

⁶⁷ [Usa ka minuto nga naghigot si Igsoong Neville bahin kang Igsoong Branham ug kang Igsoong Vaile, dayon nagsulti, “Ug

ginakalipay ko sa pag-abiabi sa mga ministro sa Dios, ilabina niadtong nagtimbayayong Niini, ug mga kauban nato Niini. Ginakalipay ko nga makadungog gikan kanila.”—Ed.] Amen. [“Busa gihangyo ko si Doktor Lee Vayle, ingon ko, ‘Mahimo bang ikaw ang magwali kon dili mowali si Igsoong Branham?’ Ug wala miwali si Igsoong Branham. Siguro nahibaloan na niya kini.”]

Wala, wala ko mahibalo. Dili unta ko makig-estorya sa ingon niana kadugay.

⁶⁸ [Nagaingon si Igsoong Neville, “Busa gihangyo ko si Igsoong Vayle, karong gabhiona, kon mahimo siyang mowali kanato, pag-dili mowali si Igsoong Branham. Tungod nga siya kauban niya diha sa mga buluhaton, ug nahibalo gayud siya bahin sa Dalan, niingon Dalan. Ug nalipay gyud kita nga ania uban kanato si Igsoong Vayle. Ginapasalamatan ko siya ug ginarespeto ko siya ingon man usab sa sa akong pagrespeto sa ubang mga ministro, ug sama sa akong gibuhay sa tanang uban pa. Ug busa kon mahimo niyang moanhi karong gabhiona ug magwali kanato, gikalipay ko gyud nga buhaton niya kini.”—Ed.] Amen. [“Ang Dios magapanalangin, ug mag-ampo kita alang kang Igsoong Vayle. Ang uban kaninyo wala pa nakadungog kaniya, ug nagasalig ako nga mag-ampo kamo alang kaniya.”] Oo.

⁶⁹ Dili ko kuhaon ang tanang oras niya. Nagapangayo ko og pasaylo sa mga mananambong. Wala ko nahibalo, sa paglingkod ko didto, nga siya . . . andam na kini. Ang Dios magapanalangin kanimo, Igsoong Vayle.

⁷⁰ [Nagaingon si Igsoong Lee Vayle, “Wala kini naandam daan. Miingon siya, kon ikaw kono ‘dili magwali.’ Ug anaa na man ka.” Nangatawa sila Igsoong Branham ug ang kongregasyon—Ed.] Maayo. Okey lang.

⁷¹ Nadungog ko na siya, mismo. Miwali na si Igsoong Vayle nga una kanako sa makadaghan nang higayon, diha sa mga panagtigum, ug—ug sa uban pa. Nakapagdumala na siya og mga panagtigum sa dugay nga panahon, ug maayo kaayo nga igsoon, nakabuhay na og dinagku nga buluhaton. Ug sigurado ako nga kining mga ania kanunay gyud nga malipay nga madungog si Igsoong Vayle pagnag-wali na siya. Panalanginan sa Ginoo si Igsoong Vayle.

⁷² [Nagawali si Igsoong Vayle sulod sa sitenta ka minutos bahin sa Marcos 16:15-20 ug sa ubang mga Kasulatan, nga giulohan: *Nganong Wala Kono Namuhay Ang Marcos 16? Ug Sa Unang Paagi, Sumala Sa Kasulatan, Ang Buhaton Aron Makapamuhay Kini*—Ed.]

⁷³ Ingon gayud ka igo ang mga nasulti hangtud nga ako—ako—nga halos wala na ko’y ikadugang pa niini. Ug nagatoo gyud ko nga ang Ginoo kadto ang nagpamuhay para mahatud ni Igsoong Vayle kining mensahe, human kaganinang buntag.

Nakita n'yo, kinahanglan sa ingon niana gyud nga paagi. Atong—atong ginadawat kana nga gikan sa Dios. Unsa nga, daghan nga mga butang ang iyang gipanghisgotan; ako—ako—duna ko'y baynte nga gipangsulat dinhi nga puedeng iwali, gikan sa iyang gipanghisgotan.

⁷⁴ Nagahunahuna ako dinhi og usa ka gamay'ng panghulagway, aron ikasuportar sa unsay iyang gisulti. Karon, nagalantaw kita sa niining orasan, aron mahibaloan kung unsa na ang oras. Gawas kon ang tanang mga instrumento sa sulod nianang orasan nagakatakdo, sa usa'g usa, sa dili gyud nato mahibaloan ang hustong oras. Husto ba kana? [Nagaingon ang kongregasyon, "Amen."—Ed.] Ug ingon niana usab kanatong tanan, ang tanan kanato, kon gusto natong makita ang Ikatulong Pagbira, nga himoon ang usa ka butang para sa Dios, pagpakigtambayayong kini sa usa'g usa, sa pagpaubos sa atong mga kaugalingon sa atubangan sa Dios ug isugid ang atong mga kasal-anan, ug mag-ampo, ug toohan ang Dios sa niining mga butang.

⁷⁵ Nagatoo gyud ko nga ang giwali ni Igsoong Vayle mao ang Kamatuuran, nga dili gayud ipahiluna sa Dios ang Iyang Espiritu diha sa usa ka dili-balaan, dili-matarung, dili-masinugtanon nga templo. Dili. Kinahanglan moagi kini diha sa—sa paagi nga pagahinloan ang atong mga kasingkasing gikan sa tanang kahugawan ug kalapasan, aron kita mamahimong putli atubangan sa Dios, aron ipapamuhat Niya ang Iyang putli nga Balaang Espiritu pinaagi kanato, aron dalhon kining tanan sa katumanan. Ako—nagahunahuna ako niana, nga sa inyong pagpamauli karong gabhiona, kon inyong basahon ang Libro sa Judas, mas daghan pa ang makat-onan ninyo bahin sa kon unsa ang giwali ni Igsoong Vayle karon. Ug miingon siya, "Makigbisog sa pagpanalipod sa tinoohan nga sa makausa gikatugyan kaniadto sa mga balaan." Napahilayo sila gikan Niini. Kon giunsa nga ang mga tawong dunot ang hunahuna, ug uban pa, nakasulod ug gilimbongan sila palayo gikan sa—gikan sa matuud nga mga butang nga iya sa Dios.

⁷⁶ Ug makahimo lamang ang Dios sa pagpamuhat ingon nga atong katugotan Siya nga magpamuhat. Ug adunay daghang maanindot nga mga butang, nga akong igasulti. . .

⁷⁷ Kabalo mo, ang mga tawo gusto og gahum, ug wala gayud sila mahibalo kon unsa ang gahum. Kita n'yo, sila—wala sila mahibalo kon unsa—kon unsa—kon unsa ang kalakip niini. Ang—ang dalan paitaas mao ang pagpaubos, sa kanunay. Kon gusto ka og gahum, himoa kung unsaon kang mamahimo pang mapainubsanon. Tangtanga ang tanan mong kalibutanong panghunahuna, ug magpaubos sa imong kaugalingon sa atubangan sa Dios, ug dayon magkaaduna ka og labaw pa nga gahum kay sa usa ka tawo nga nagadagan sa tibuok bilding ug nagahimo og dakung kasaba; kita n'yo, tungod kay nahimo

mong buntogon ang imong kaugalingon, ug gitugyan ang imong kaugalingon ngadto kang Cristo, nakita n'yo, ang magpaubos sa imong kaugalingon sa Iyang atubangan. Mao kana ang tinuud nga gahum.

⁷⁸ Ipakita kanako ang usa ka iglesia nga mapainubsanon, tinuud nga mapainubsanon, dili usa—usa ka mapalabilabihon; usa ka iglesiang, malomo, mapaubсанong iglesia, igapakita ko kaninyo ang usa ka iglesia nga gikahimut-an ug dunay gahum sa Dios diha niini. Husto kana. Mao kana ang butang nga gikinahanglan niini, ang pagpaubos, ginapaubos ang atong kaugalingon atubangan sa Dios, ginatugotan ang Dios nga mamuhat pinaagi kanato. Dili kinahanglan nga maghimo pa og mga pagsaba.

⁷⁹ Usahay, sama sa gisulti sa mag-uuma, sa pag-adto niya ngadto sa umahan uban sa iyang bagon, ug, sa matag agi niya sa mga buntodbuntod, magkaragkarag kini ug magsaba-saba gayud. Apan sa dihang pabalik na siya, pag-agi niya sa mao rang buntodbuntod ug dili na kini magsaba-saba, tungod kay puno na kini sa mga maayong butang.

⁸⁰ Busa nahunahuna ko nga husto kana, kita n'yo, nga pag kita'y puno sa mga maayong butang nga iya sa Dios, makita gayud ang bunga sa Espiritu pinaagi kanato. Maingon sa iyang gipahanungdan og ayo diha sa Unang Mga Taga-Corinto 13, ug giunsa, nga, “Bisan itahan ko pa ang akong lawas aron pagasanogon, ug aduna pa kanako ang tanan niining mga butang, ug apan wala'y gugma; wala kini kapuslanan, dili kini magpulos kanako.” Kita n'yo, gusto natong buhaton kana.

⁸¹ Labaw sa tanan, indibiduwal kini natong mga kalag nga panubagon nato sa atubangan sa Dios. Kita n'yo, kini—*ikaw* kini ang moadto sa Langit. Dili kini nga makaadto ba *ako* didto, o *siya* ang makaadto. *Ikaw* kini ang moadto, kita n'yo, ug *ikaw* usá. Ug kinahanglan nga masigurado mo gyud kini ug malomo nga magduol sa atubangan sa Ginoo.

⁸² Ug sa kanunay akong makita nga ang tawo nga nagapaubos sa iyang kaugalingon mao ang ginapahitaas sa Dios. Pag may makita kang tawo nga nagpabukdobukdo sa iyang dughan ug nahibalo sa tanan, ug dili mo na siya mahimong sultihan, ug mapahitas-on siya, ug—ug, bueno, kana—kana nga tawo wala gyu'y mapaingnan. Apan tan-awa kanang tawo nga nagapaubos sa ilang kaugalingon ug malomong nagakinabuhi.

⁸³ Nagpakig-estorya ako sa usa ka lalaki sa miaging adlaw, nga nagaorganisa didto og usa ka pang-simbahan nga . . . migawas siya gikan sa usa ka organisasyon nga kabahin siya kaniadto. Ug, bueno, si Igsoong Boze kini, ug kini nga iglesia diin sila gikan, dugaydugay na nga panahon nga nagasimba sila nianang iglesia, ug gipanalanginan siya sa Ginoo. Dayon ang mga tawo miabot sa punto nga gusto nila nga mamahimong moderno nga

sama sa uban pa kanila, ug gusto nilang himoon kini nga sa usa ka organisasyon. Ug sa dihang gibuhay nila, kini ang... kadtong mga mapaubsanong Cristohanon didto dili gusto niana. Sa tibuok nilang kinabuhi, natudloan sila nga batokan kana, busa mibiya sila niini. Karon aduna sila'y usa ka pundok, ug gipanalanginan sila sa Ginoo hangtud sa punto nga sila, aduna na sila'y usa ka daku nga bilding karon, usa ka simbahan nga makapasulod og mga upat o lima ka libo nga mga tawo, ug magsugod sila pag-usab.

⁸⁴ Ug sila miduol kanako, ug miingon, "Igsoong Branham," naglingkod kami didto sa opisina, sa opisina sa simbahan, sa miaging adlaw. Ug miingon siya, ang usa sa niining mga lider, si Igsoong Carlson ug sila, miingon, "Unsa ang ngay namong buhaton?"

⁸⁵ Ingon ko, "Pangita og usa ka tawo nga mahimong magbalantay nga wala nailhan sa unsa man nga denominasyon, nga tinud-anay gayud, tinuud, malomo, mapainubsanong igsoon nga anaa sa iyang kinabuhi. Ang Dios na ang moatiman sa uban pa niini, kita n'yo." Ingon ko, "Usa ka pastor nga nagapakaon gayud sa karnero, ug magpaubos ug ingon anang mga butang, ang Dios na ang moatiman sa uban pa. Kon imong... Dili sa kung kinsa nga nahibalo-sa-tanan sa pagsulod niya pa lang, nga ipahimutang kono *kini* sa kahan-ayan, ug kini kono kinahanglan nga ingon *ani*, ug panglakturan ang mga butang." Ingon ko, "Dili gyud kini magpulos. Naagian na ninyo kini."

⁸⁶ Mao kana, kinahanglan nga nagakaduyog sa pagbuhay ang matag bahin sa iglesia, ug kinahanglan ninyong buhaton ang inyong bahin niini. Busa makita nato kung unsa na nga oras ang gikinabuhian nato. Tingali mas haduol na kita kay sa atong gihunahuna kon asa na kita.

⁸⁷ Karon, ginapasalamat nato si Igsoong Vayle. Dili ba? [Nagaingon ang kongregasyon, "Amen."—Ed.] Ang Ginoo magapanalangin kanimo, Igsoong Vayle. Salamat. Ug ginapasalamat namo ang Ginoo sa paghatud niining bililhong mensahe para kanamo karong gabhiona.

⁸⁸ Ug nakadawat ako og mubong-sinulat, pipila pa lang ka minuto ang milabay. Usa ka igsoong babaye nga adunay gustong isulti, bahin sa iyang damgo. Kon mahimo isulat mo na lang kini og ipaabot kanako, igsoon, akong—akong... Gihatag niya kaniadto ang uban sa iyang mga damgo og tinuud gayud. Dili tanan nga mga damgo ginadawat nato. Dili, dili. Apan kon gikan kini sa Dios, gusto natong mahibaloan nga ang Dios kini nga nagapakig-estorya kanato.

⁸⁹ Sama sa ang tanan nga gisulti diha sa laing mga dila, wala nato kini ginatoohan; apan kon adunay paghubad nga nagasulti kanato og usa ka butang nga magakahitabo, makita nato nga

nahitabo kini, nan ginapasalamatan nato ang Ginoo alang niini. Kita n'yo?

⁹⁰ Gusto natong ipahigayon kini nga hapsay, sa paagi nga malomo, ug sa kahan-ayan nga iya sa Ginoo. Busa hinumdumi lang, nga tingali ang imong bahin mao ang pinaka-ispring, o tingali ang gamay, gamay nga kamot, o gamay'ng parti, o ang lisoanan sa gawas sa orasan, unsa man kini, o tingali kamot kini diha sa dagway sa orasan, nga maoy nagatug-an sa oras. Apan unsa man kini, nagkinahanglan gyud kini kanatong tanan nga nagakaduyog sa pagbuhat uban sa Ebanghelyo ni Jesus Cristo, aron mahitabo kini.

⁹¹ Hunahunaa lang! Kon ang mga gasa maoy halangdon kaayo, kanang gitawag nato nga gahum; ug miingon si Pablo, “Bisan pa nga aduna ko’y pagtoo nga mapairog ko ang bukid, ug wala’y gugma, ako wala’y kapuslanan.” Hunahunaa kana.

⁹² Ug bisan pa nga ginaingon nato, “Buena, bisan pa nga akong—akong nasabtan...unta kung nahibaloan ko lang ang Biblia.”

⁹³ “Bisan pa akong masabot ang tanan nga mga tinago sa Dios,” kita n'yo, “ug bisan pa nga mahimo ko kini ug wala’y gugma, ako wala’y kapuslanan,” kita n'yo, “wala pa ako’y nadangtan.” Kita n'yo, ang pinaka-importante, higugmaa ang Dios, ug magpaubos sa imong kaugalingon tungod niini.

⁹⁴ Karon, sigurado, human sa niining tanan nga mga tuig diha sa natad sa pag-misyon ug sa paglibot sa kalibutan, ug nakita ang nagkalainlaing mga tawo, angay lang nga nakahibalo na ako og diyutay bahin sa pultahan nga pagasudlan. Ug kon gusto mong may mapaingnan ka sa Dios, ayaw gayud tugoti nga makaduol kanimo ang mapahitas-ong espiritu. Ayaw tugoting makaduol kanimo ang pagkamadinauton. Bisan unsa pa ang ginabuhay sa uban, kon nasayup man sila, ayaw gayud og paghupot og dili-maayo batok nianang tawhana. Kita n'yo? Magmalomo ka ug magmaloloy-on. Hinumdumi, gihigugma ka sa Dios niadtong anaa ka pa sa kasal-anan. Ug kon ang Espiritu sa Dios anaa kanimo, higugmaon mo ang ubang tawo sa dihang anaa siya sa kasaypanan. Kita n'yo, iampo sila, ug maghigugmaay sa usa'g usa.

⁹⁵ Labaw sa tanan, higugmaa ang Dios ug maghigugmaay sa usa'g usa. Ug magmapainubsanon atubangan sa Dios ug sa usa'g usa, ug ang Dios magapanalangin kanato, ug malisod isulti kon unsa ang Iyang pagabuhaton. Kasagaran kon ang iglesia nagasugod na og daghan ug hinayhinay nga nagadaku pa, o ingon niana, dayon nagapahilayo na sila gikan nianang tinuud nga butang, nianang tinuud nga butang.

⁹⁶ Kabalo ba mo kung unsa ang nagpahinungdan nga mahitabo kining mga butanga, sa dihang misugod ako kaniadto ug ang Ginoo nagpakita kanako didto sa suba ug nagsulti kanako

niana? Ug nakita kini ni Igsoong Vayle, sa pagtoo ko, sa usa ka mantalaan didto sa Canada, daghan na nga mga tuig ang milabay, sa dihang ang Anghel sa Ginoo nagpakita didto sa suba, gimantala kadto sa Associated Press, “Misteryosong Kahayag ibabaw sa lokal nga ministro, samtang nagabautismo.” Ug—ug nahibalo ba mo kung unsay gibuhat niana? Sa dihang nagpahigayon kami og panagtigum tabok lang sa kalye, usa ka tolda nga mosigo og mga, oh, baynte-singko ka gatus nga mga tawo, mga ministro nga gikan sa tanang lugar, ug miingon, “Igsoon, ari ka sa makadiyut lang.” Batan-on pa ako niadto, nga, oh, bata pa lang. Ug miingon siya, “Giunsa nimo nga nagkahiniusa man kanang mga tawo? Nahigugma sila sa usa’g usa hangtud. . .wala pa ako nakakita og mga tawo nga nahigugma sa usa’g usa sama niana.”

⁹⁷ Ang Ginoo kana. Sa ingon niana gitukod kini nga iglesia, sa nianang diosnon, inigsoong gugma alang sa usa’g usa. Nakita ko sila nga naglamanohay sa usa’g usa, nga nagabiya sa lugar, ug nagahilak nga sama sa mga bata, nga magkabulagbulag na diay sila. Nahigugma gayud sila og ayo sa usa’g usa. Ug sa pagduaw ko kanila sa ilang panimalay, ug may mga panahon nga ang Biblia abli pa ug may tulo kini sa mga luha. Pagmakaduaw ko, sa gabii, maabtan ko nga ang mga amahan ug mga inahan nagkatigum, ug uban sa ilang mga gagmay’ng kabataan atua sa salog, nga nanagluhod; ug nanagluhod ang maong mga amahan ug inahan, nanaghilak ug nanag-ampo. Didto ako sa pultahan nagatindog ug nagahulat ug nagahulat ug nagahulat. Ug wala sila mihunong sa pag-ampo, molingkod na lang ako didto sa hagdanan ug mosugod na lang pud og ampo, mismo, sa paghulat kanila, kita n’yo. Ug nga—ingon niana kadto. Ug gihigugma nila ang usa’g usa. Gihigugma gyud nila ang usa’g usa. Kasagaran manindog kami kaniadto ug kantahon kanang dugay na nga kanta:

Panalanginan ang bugkos nga nagabugkos
 Sa atong mga kasingkasing anaa ang
 Cristohanong gugma;
 Ang pagpakigkauban sa kaparehong
 hunahuna
 Sama nianang sa Kahitas-an.
 Sa panahon nga kita magkabulagbulag,
 Nagahatag kini kanato og hilabihang kasubo;
 Apan anaa gihapon kanato ang pagkakonektar
 sa kasingkasing,
 Ug naglaum nga magkakita-kita pag-usab.

⁹⁸ Ginasulti ko kini uban sa dakung kalipay sulod sa akong kasingkasing, alang kang Cristo. Daghan kanila ang nangatulog na didto sa minarkahang mga lubnganan niining gabhiona, nagahulat alang sa nianang dakung pagkabanhaw kon diin magkitaay kita pag-usab.

⁹⁹ Ayaw gayud tugoti nga mobiya kana nga espiritu gikan niining dapita! Pagmahitabo kana, nan dili ko igsapayan kon unsa pa ka maayong manulti ang inyong pastor, kon unsa pa ka maayo ang pagdala niya sa Pulong sa Dios, nahipasubo n'yo ang Espiritu sa Dios nga mibiya kini. Kita n'yo? Sa diha nga mahimo nato ang tanang butang diha sa pagpakig-fellowship, nga pare-pareho ang tanan, ug naghigugmaay sa usa'g usa, nan magapamuhat ang Dios uban kanato.

¹⁰⁰ Ug ginapaabot nato ang panahon, nga ang mga tawong nakaanhi moingon, "Kon gusto kamong makakita og iglesia nga tinuod ka mapainubsanon, usa ka iglesia nga nahigugma gayud sa Dios, paghapat didto usa ka higayon nianang tabernakulo ug pag-obsarbar kanila. Tan-awa ang ilang mga kahingawa alang sa matag usa, ang pag-respetohanay; pagginawali na ang Ebanghelyo, kon unsa ka matinahuron, kon unsa nga ang tanan anaa sa kahan-ayan." Oo, dayon matan-aw nila ug makita kon unsa na nga panahon ang atong gikinabuhian. Makita ninyo ang Espiritu sa Dios nga nagapanglihok sa inyong taliwala, dagkung mga ilhanan ug mga katingalahan ug ingon-anang mga butang ang magakahitabo. Kon ang maong butang nagakaduyog sa pagbuhat, magtug-an kini og oras. Apan kung wala na kini nagapamuhat, nan mohunong ang pag-oras, dili na kini makapagsulti og oras. Busa kon gusto natong mahibaloan kon unsa na nga panahon ang atong gikinabuhian, magsugod lang nga nagakaduyog sa pagbuhat ang matag usa diha sa Ebanghelyo, nga nagahinigugmaay ang usa'g usa, gihigugma ang Dios, ug ang kamot niini mismo magatug-an sa oras kon unsa na ang atong gikinabuhian. Nagatoo ba kamo niana? [Nagaingon ang kongregasyon, "Amen."—Ed.] Sigurado. Amen. Ang Ginoo magapanalangin kaninyo, sa madagayaon gayud.

¹⁰¹ Ayaw'g kalimti karon, tinguhaa nga makaanhi niining semanaha. Ug kung may kaila mong mga masakiton nga kinahanglan moanhi, sultihi sila, kon kanus-a sila moanhi, ingna, "Langga, hangyoon ta ka. Magkaaduna kami og mga pag-ampo alang sa masakiton, sa Dominggo sa buntag, didto sa tabernakulo. Ug dugaydugay ka nang nagmasakiton, karon gusto kong..."

"Bueno, gusto ko nga moadto. Dugay ko nang gusto nga moadto."

¹⁰² "Karon, bag-ohay ko lang nadungog ang mensahe niadtong Dominggo sa gabii, gikan sa usa ka igsoon didto, nga kon unsa nga kinahanglan natong isugid ang atong mga sala sa usa'g usa, ug mag-ampo para sa usa'g usa, aron mamaayo kita. Santiago 5:14, 13, 14, 15, kita n'yo, nga kinahanglan natong isugid ang atong mga sala sa usa'g usa sa dili pa kita moduol alang sa kaayohan. Oo. Isugid ang atong mga sala sa usa'g usa, ug mag-ampo para sa usa'g usa." Kita n'yo? Kita n'yo, eksaktong ingon niana sa kon unsay iyang ginasulti karong gabhiona, nga

ginapasig-uli ang mga beatitudes sa Marcos 16. Pagmagkauban kini, naangkon mo kini, dayon mahitabo ang mga pagpang-ayo.

¹⁰³ Tan-awa si Jesus, walay lain kondili usa ka bugkos sa gugma. Kita n'yo? Siya ang Dios nga nadayag. Siya, ang Dios, gipadayag Niya ang Iyang-kaugalingon pinaagi Kaniya, dili ikahibulong nga ang mga milagro ug ang ingon-anang mga butang nangahitabo. Ang Iyang mapaubsanon nga kinabuhi, ug ang hinalad nga kinabuhi; aron moanhi gikan sa pagka-Dios, aron mahimong tawo dinhi sa yuta, aron maipadayag ang Dios pinaagi Kaniya. Mao kana ang nakapahimo Kaniya kon unsa Siya kaniadto. Kanunay kong ginaingon, "Unsa may nakapahimo kang Jesus nga Dios, alang kanako, sa paagi nga Siya nagpaubos sa Iyang-kaugalingon. Pagkadaku Niya kaayo, ug bisan pa niana nahimo Siya nga pinaka-gamay." Kita n'yo? Husto kana.

¹⁰⁴ Ang Ginoong magapanalangin kaninyo og maayo. Karon manindog kita, ug alang sa pagpapauli. Sulayan nato ang kining usa (mahimong dili mo sinati kini, igsoong babaye), kining, *Blest Be The Tie That Binds*. Kantahon nato kana sa makausa pa, mahimo ba? Hatagi kami og tuno.

Blest be the tie that binds
Our hearts in Christian love;
The fellowship of kindred minds
Is like to that Above.

¹⁰⁵ Karon samtang ginakanta nato ang ulahing laray, gunitan nato ang kamot sa usa'g usa, "*when we asunder part*," ug ingna lang, "ang Dios magapanalangin kanimo, igsoong lalaki, igsoong babaye. Malipayon kaayo ako nga maania dinhi kauban mo karong gabhiona." Kita n'yo, mora'g ingon niana, unya lingia ang anaa sa luyo dayon. Karon kantahon nato kini.

When we asunder . . .

Ang Dios magapanalangin kanimo, Igsoong Neville!

It gives us inward pain;
But we shall still be joined in heart
And hope to meet again.

¹⁰⁶ Gihigugma gyud nato ang Ginoong Jesus? Dili ba? [Nagaingon ang kongregasyon, "Amen."—Ed.] Unsa nga . . .


Till we meet!
Till we meet at Jesus' feet; (hangtud sa atong
sunod nga pagkita-kita!)
Till we meet! till we meet!
God be with you till we meet again!

Ipiyong nato ang atong mga mata, ug kantahon lang kana diha sa Espiritu karon.

Till we meet! till we meet!
Till we meet at Jesus' feet;
Till we meet! till we meet!
God be with you till we meet again!

¹⁰⁷ Karon samtang nagaduko ang atong mga ulo. Mga anak lamang kita, mga anak sa Dios. Atong laylayon kini. [Si Igsoong Branham ug ang kongregasyon nagsugod og laylay, *God Be With You—Ed.*] Oh, siguradong nagahatud kana kanato sa Espiritu sa Dios! Mahunahuna ba ninyo sa kaniadtong mga adlaw sa dihang didto sila nanaglingkod sa papan sa bato?

God be with you till we meet again!

¹⁰⁸ Samtang nagaduko ang atong mga ulo, akong hangyoon si Igsoong Allen dinha sa likod, usa ka bag-o nga igsoon nato, kon mahimo ba niya kita paulion na diha sa usa ka pulong sa pag-ampo. Igsoong Allen. 

MAGPAUBOS KA SA IMONG KAUGALINGON CEB63-0714E
(Humble Thyself)

Kining Mensahe ni Igsoong William Marrion Branham, una giwali sa Ingles niadtong Domingo sa gabii, Hulyo 14, 1963, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org